

Nia unua UK

Ĉu reala (fizika, ne reta) internacia kongreso ne estus la vera enirejo al la Esperanto-movado? Tio estas nia sento post partopreno en la UK 2022 en Montrealo. Post du jaroj de pandemio, ĉiuj timis ke denove ĉi-jare, fizika renkontiĝo ne okazos, sed mirakle, ĝi okazis, por nia granda plezuro. Ni povas imagi la plurmonatajn grandegajn streĉojn por la organizantoj. Finfine la Universala Esperanta Asocio, apoganta sur tre vigla grupo de esperantistoj en Kebekio, sukcesis fari grandan eventon, kiu restos longe en nia memoro kaj de ĉiuj partoprenantoj. Bedaŭrinde, por kialoj rilataj al la konsekvencoj de la nunaj mondskalaj krizoj, ne ĉiuj el la pli ol 800 aliĝintoj sukcesis veni al Montrealo.

En tiu artikoleto ni ne ripetos informojn kiujn oni povas facile trovi sur la reto [<https://uea.org/kongresoj>] sed nur faros kelkajn rimarkojn specifajn al la novuloj kiujn ni estis. Tiu kongreso estis por ni ekzakte kiel ni esperis : escepta semajno plena de renkontoj, de interesaj diskutoj kun scivolemaj homoj, de lernado pri la esperanta movado kaj pri Kanado, de vizitoj al interesaj ejoj en aŭ ĉirkaŭ Montrealo, de artaj prezentaĵoj en bela kaj komforta teatrejo. Por iuj kiuj estis ĉiamuloj de internaciaj sciencaj kongresoj kiel unu el ni, UK 2022 havas nenion por envii al aliaj grandaj internaciaj konferencoj. Unue ĝi okazis en UQAM, granda universitato, bone ekipita por ricevi tiajn eventojn. La sesioj en kiuj ni partoprenis, kaj verŝajne la aliaj, estis profesie gviditaj de spertuloj, kun helpo de lokaj volontuloj kiuj zorgis pri la teknikaj aspektoj, tre gravaj por multe da sesioj kiuj estis rete videblaj.



Kelkaj el la tutaj 500 partoprenantoj kiuj sukcesis trovi lokon sur la komuna foto sur la granda ŝtuparo de la placo de festivaloj.

Unu demando kiun ni havis antaŭ ol iri al Montrealo estas la jena : ĉu esperanta UK tute similas al tradiciaj spertaj kongresoj? La respondo estas, jes kaj ne.

Kiel UK similas al aliaj fakaj kongresoj?

- Disponeblas antaŭ la evento, detala libreto por prezenti ĉiujn programerojn, ebligante la partoprenantojn organizi ilian semajnon. En tiu UK, unuafoje saĝtelefona aplikaĵo estis proponita, ĝi estis tre utila kaj efika.
- En ambaŭ kazoj okazas deko da paralelaj sesioj en sufiĉe proksimaj ĉambroj por ke oni povus facile iri de unu programero al alia, iun ajn momenton.

- Ĉiu sesio estas gvidata de fakulo en la koncerna areo. Li aŭ ŝi organizas la interŝanĝojn, certigas, ke la daŭro de la interveno estas respektata kaj estas helpata de fakuloj pri teknikaj problemoj.

Kiel UK malsimilas?

- La listo de krom-aktivaĵoj kiuj ebligas la partoprenantojn konatiĝi kun la gastiganta urbo kaj la listo de ŝatokupoj kiel vesperkoncertoj, estas pli granda ol dum kutimaj, profesiaj kongresoj.
- La amplekso de temoj de la programo estas multe pli vasta ol por aliaj kongresoj. Tio ne estas surpriza ĉar esperanto estas nur ilo de internacia komunikado inter scivolemaj kaj toleremaj homoj. Efektive en UK 2022 ĉiu povis trovi ion interesan por si por aŭskulti aŭ diskuti.
- Granda diferenco estas ke la nocio de konkuro ne ludas grandan rolon en UK, kiam en tradiciaj konferencoj ĉiuj volus havi la plej valoran aŭ gravan rezulton por sia esploro aŭ laboro.

Taŭgaj lokoj por ĉiuj aktivaĵoj.

Montrealo estas granda universitata urbo. Nesurprize ke la organizantoj elektis lokojn en universitato. La kongreso okazis en tri diversaj lokoj :

- Universitato de Kebekio (UQUAM) por la stud-sesioj
- Granda teatrejo por la solenaj kunvenoj kaj koncertoj
- Apuda hotelo por la bankedo kaj balo.

Por la manĝaĝo estis kafejo surloke kaj multe da diversaj manĝlokoj en la proksimeco.

Laŭ nia vidpunkto, la praktikaj kondiĉoj por tiu UK estis tre bonaj. Unu minuso povas esti la altaj prezoj por loĝi en tiu parto de la urbo. Sed estis facile trovi malpli kostan loĝlokon en distanco de duonhoro per publika transporto, tion ni faris.



10 ĉambroj de diversaj ampleksoj por studado.




Granda kaj komforta teatrejo por solenaj kunvenoj kaj koncertoj.

UK 2022 : amaso da agadoj kaj temoj por ĉiuj gustoj kaj profiloj.

Ĉi-jara UK havis kiel ĉefa temo, la “Jardeko de Indiĝenaj Lingvoj”. Mark Fettes, antaŭa prezindento de UEA estis la reĝisoro de la temo. Dum la semajno multe da sesioj kaj eventoj rilatis al lingvoj ĝenerale, kaj indiĝenaj lingvoj kaj kulturoj precipe. Kelkaj membroj de kanadaj indiĝenaj grupoj partoprenis en la rilataj sesioj kaj riĉigis la vesperajn koncertojn. Ekstere ankaŭ, proksime de la kongresa loko, okazis ekspozicioj kaj publikaj koncertoj fare de diversaj

kanadanaj indiĝenoj. Bedaŭrinde ni ne sukcesis ĉe-esti iun aranĝon de tiu festivalo. Tiom da prelegoj, eventoj kaj agadoj nin entuziasmigis sed kompreneble, ni devis elekti nur kelkajn por manko da tempo, kvankam multaj aliaj estis tre alogaj.

Mallongaj filmoj tradukitaj en esperanto, estis proponitaj. Interesaj kaj kortuŝaj, ili donis parolon al indiĝenaj homoj el diversaj nacioj. La kongreso honoris la faman montrealan poeton kaj komponiston Leonard Cohen per filmo kiu montras lin kiel juna viro en sia hejmurbo. Bona komplemento estis la eblo malkovri la multnombrajn verkojn en esperanto aŭ librojn pri la lingvo kaj la movado dank'al la libroservo.



UK 2022 estis okazo por multe lerni pri la lingvoj kaj kulturoj de Indiĝenaj grupoj de Kanado kaj aliaj landoj. Gustavo, membro de la TUPI komunumo de Brazilo tre aktive partoprenis la kongreson.

Lingvaj problemoj

Kompreneble la organizantoj proponis dekon da prelegoj pri Kanado. Krom pri historio tiuj prelegoj temis pri lingvaj problemoj en Kebekio. Ankaŭ lingvaj problemoj en Belgio estis prezentitaj. Aŭskultante tiujn prelegojn, ni multe lernis pri malfacilaĵoj en multlingvaj landoj.

Verkado kaj literaturaj konkursoj.

Okazis dum la kongreso anonco de la premiitoj de la Interkultura Novelo-Konkurso kaj legado de ecoj de iliaj verkoj. Estis precipe interesa konstati ke tiom da homoj, inter ili multe da junuloj, ŝatas verki en Esperanto. Ni ĝojis havi eblon renkonti ilin dank' al UK.

la Internacia Kongresa Universitato (IKU)

Ĉi-jare UK enhavis la 75an sesion de IKU. Ĝi estas unu el la plej popularaj kaj prestiĝaj programeroj de la kongreso. Sep fakuloj prelegis pri diversaj temoj kiel astronomio, ĥemio de akvopurigado, petrofiziko, ekonomiko, medicino. Krome, ekde 2015 estis aldonita Scienca Kafejo. Dum du sesioj ok spertuloj prelegas pri popularaj sciencaj aŭ teknikaj temoj. En Montreale la temoj rilatis al matematiko, fiziko, lingvistiko, geologio. Ĉiuj prelegoj estis kompletigitaj per artikoloj aperintaj en libro eldonita en papera formo. La libro estas aĉetebla sur la UEA retejo.



Kursoj kaj ekzamenoj.

Ni multe aprezis kelkajn el la viglaj kursoj de Sylvain Lelarge kiu tre lerte instigas interagojn inter la partoprenantoj. Dediĉi tempon al la preparado kaj trapaso de KER ekzameno organizita


de Katalyn Kovacs estus utila, sed kiel unuafojaj kongresanoj ni elektis malkovri kiel eble plej multajn programerojn.

Solenaj kaj distraj partoj.

La distra parto de la programo estis precipe sukcesa. La membroj de kebekiaj kluboj aktive partoprenis, ne nur en la organizaĵo kaj ankaŭ en la partopreno de la spektakloj.



La ĥoro, direktita de Zdravka ofertis belegajn kantojn kaj Gary Evans, la kasisto de la kongreso, estis majesta en la rolo de Sinjoro Mann kiu parolas pri la vojaĝo de L. L. Zamenhof al Ameriko.



Folkloraj dancoj, kantistoj, ĥoranoj, muzikistoj ludante pianon, aŭ violonon, banĝon, tamburon, allogis la publikon. Alia surprizo estis la spektaklo “Stelmani”, la fama rok-opero, kion Gijom’ Armide adaptis.

Dum la solena fermo, kortuŝa estis la danko esprimita de la UEA prezidento al la diligenta loka teamo. Kaj kiel bona ideo de la ĥoruso omaĝi al Leonard Cohen, kantante Haleluja por la grandega plezuro de la tuta publiko.

Konkludo.

Esperanta Universala kongreso estas profesie organizata tutmonda evento. La proponataj prelegoj kaj diskutoj havas tre altan kvaliton. La diverseco de temoj, la granda nombro de aktivaĵoj faras ke ĉiu esperantisto havante meznivelan konon de la lingvo, povas partopreni kaj tiel havi esceptan semajnon por memorigi. Espereble, venonta-jara eldono en Torino, Italujo, ebligos multe pli da partoprenantojn ĝui la eventon, kaj trovi tie, multe da kialoj daŭrigi sian esperantajn aktivaĵojn.

Laure kaj Ĵoel, novbakitaj en la movado.